

# Familienuus 344

## **MET DIE LIG NA DIE GEMEENSKAP!**

Dis lekker koud in hierdie dae. Ons kla oor die krag wat nie altyd aan is nie. Ons maak allerlei planne om warm te bly: verwarmers, kaggels en komberse.

Gelowiges wat met die hart van Jesus Christus in die gemeenskap leef, behoort ook in hierdie dae raak te sien dat daar baie mense is wat nie warm kan kom nie. Hulle blyplekke, hulle omstandighede, hulle "klerekaste" en hulle bronne maak dit net nie moontlik nie.

Baie gemeentes is met projekte besig om hier 'n verskil te maak. Die getuienisse wat ek hoor, is dat dit ook 'n verskil maak in die harte van hulle wat gee. Daar is groter sensitiwiteit en meer bewustheid van ander se leefwêreld.

Geestelike groei vra om al-hoe-meer 'n hart soos Jesus te kry...

Francois Retief

—o0o—

## **PREDIKANTE**

Gert van der Merwe is op 22 Julie by Lynnwoodrif bevestig.

Sebastiaan en Natasha van Dyk van Lux Mundi het op 10 Junie ouers geword van Ivan. Baie geluk – en sterkte vir die winternagte se opstaan!

Annelize de Wet het op 30 Junie demissie ontvang by kerksondermure om haar roeping as sendeling in Kenia te gaan uitleef.

## **PROJEKTE**

**Skolebediening:** as jy nie elke geleentheid benut om kinders in

ons skole te bedien met die Evangelie van Jesus Christus nie, mis jy 'n baie groot deel van jou jeugbediening. Die vraag is: Hoe doen ek skolebediening?

Hier is die [antwoord!](#)

**Johan Koen** van ons **Missionale Gemeentes**-span vertel van Nuwe Geloofsgemeenskappe – die bediening van mense wat nie normaalweg deel van die bestaande bediening is nie. As julle hiermee besig is, wil Johan graag julle [storie](#) hieroor hoor...

### **Missionale Byeenkoms**

Dit is weer tyd vir ons **Missionale Byeenkoms** en ons glo dat jul elkeen in die laaste paar maande al weer saam met jul gemeentes gegroei het op die Missionale Reis. Om gestuurde kerk te wees is die fokus wat maak dat ons perspektief behou in goeie en slegte tye. **Die byeenkoms vind plaas op 2 en 3 Augustus by Kruisrivier. Ons arriveer tussen 12:00 en 13:00 op Donderdag en vertrek weer om 14:00 op Vrydag.** By die laaste byeenkoms het julle onder andere lekker saam gepraat oor Missionaliteit as 'n nuwe lewenstyl in jou eie lewe en ook in die lewe van die gemeente. Julle het ook saam gesels oor Missionale Transformasie. Ons sal baie graag by mekaar wil hoor wat het die Here in die tussentyd in jul lewens en gemeentes gedoen. Lourens Bosman gaan ook die tyd saam met ons spandeer en met ons gesels oor die nuwe groei en ontwikkeling in die kerk rondom Missionaliteit. Ons is besig om die finale program bymekaar te sit en stuur dit deur sodra dit gefinaliseer is. Intussen moet ons getalle vasmaak en word jy uitgenooi. **Laat weet sommer nou asseblief vir Tersia by [ontvangs@sinoos.co.za](mailto:ontvangs@sinoos.co.za) of jy dit gaan bywoon.** Ons moet getalle vasmaak en waardeer jou spoedige reaksie!

Die **Projekspan vir Ekologie** reël 'n naweekvoetslaan by Mount Komati River Lodge – geleë op die Middelveld van Mpumalanga vanaf 30 November tot 2 Desember 2018. Om saam te stap en jou plek te bespreek, moet jy so gou as moontlik die

inskrywingsvorm stuur na Tersia Petzer, [ontvangs@sinoos.co.za](mailto:ontvangs@sinoos.co.za) / 012 804 9543. Daar is net plek vir 24 persone. Vir volledige inligting en die inskrywingsvorm, lees [hier](#).

## **Seisoen van Menswaardigheid**

Leon Westhoff [vertel](#) ons van 'n unieke manier om oor hierdie belangrike saak ingelig te word. Prof Dirkie Smit se lesings sal jou ook 'n handvol VBO-punte besorg – maar jy sal bietjie moet werk hiervoor!

## **Ekofaktorkamp**

Die Projekspan vir Ekologie reël weer 'n **Ekofaktorkamp** vir alle Graad 5 en 6 leerders vanaf 30 September tot 3 Oktober 2018. Die kamp word soos verlede jaar, weer gehou by **Bergenvier** (tussen Bronkhorstspuit, Groblersdal en Witbank). By hierdie jaar se kamp gaan by die *voëls en insekte geleer word waar my plek in die ekosisteem is sodat daar vir almal en alles genoeg is om te kan lewe op aarde.*

Die koste is **R400-00**. Skryf in by Tersia Petzer, [ontvangs@sinoos.co.za](mailto:ontvangs@sinoos.co.za) / 012 804 9543. Die sluitingsdatum is **19 September**. Lees [hier](#) meer.

## **Retreat vir predikante**

'n **Retreat vir predikante** vind hierdie jaar plaas vanaf 13 tot 16 Augustus by die Maria Trost Retreatsentrum naby Lydenburg. Die koste is R500 per persoon vir 3 nagte – enkel akkommodasie en etes ingesluit. 12 VBO punte word toegeken vir bywoning. Vir meer besonderhede skakel Jaco van Niekerk by 082 804 1810. Bespreek by Tersia voor 6 Augustus by [ontvangs@sinoos.co.za](mailto:ontvangs@sinoos.co.za) Lees [hier](#) meer.

## **ONDERSTEUNING**

**Argief:** Aangesien ons baie navrae kry uit die handregisterstelsel, wil ons weer 'n ernstige beroep op gemeentes doen om hul handregisters, **doop- en belydende-**

**lidmate asook Huweliksregisters** (voor 1973) asseblief na die Sinodehuis te stuur vir veilige bewaring.

## **VERGADERINGS**

Die **Sinodale Diensraad** het op 18 Julie vergader om te besin oor Sinode-wees in vandag se dae. Dit was 'n verrykende en terselfdertyd uitdagende gesprek. Ons voel uitgedaag om te verseker dat ons steeds gemeentes en leraars se behoeftes aanspreek. Daar is baie mooi nuwe inisiatiewe – hou ons sinodesitting dop!

Teen die einde van verlede kwartaal het ons **jonger leraars** onder leiding van twee van ons Sinodale Diensraad-lede, Maartje van der Westhuizen en Gerrit Vosloo, vergader om te gesels oor hulle belewenis van ons as sinode. Dit was lekker om ons jong predikante te kon hoor. Ons sien uit na die insette van jonger stemme. Ons wil 'n familie wees waar ouer en jonger leraars tuis voel, geag word en waarde kan toevoeg tot die funksionering van die Sinode.

Die volgende **Ringsittings** vind plaas:

Lyttelton: 29 Julie by Midrand

Wakkerstroom: 29-30 Julie by Paardekop

Witbank: 5 Augustus by Witbank-Panorama

Ermelo: 6 Augustus by Morgenzon

## **ALGEMENE SINODE**

### **Kerkspieël Gemeentevraelys 2018**

Lourens Bosman vra mooi: sal julle asseblief 'n tydjie afknyp om Kerkspieël Gemeentevraelys 2018 te voltooi en aanlyn in te vul? Indien julle enige probleme ondervind of nog nie die vraelys ontvang het nie skakel asb dringend met Ester Steyn by [kerkspieel@ngkerk.org.za](mailto:kerkspieel@ngkerk.org.za) tel: 012 342 0092 of sel 0823254088

Ons sal dit só waardeer!

## **Dankdag vir Reën**

Die Algemene Sinode oordeel dat 2 September as Dankdag vir die uitkoms wat die Here gegee het, geormerk word. Uiteraard is hierdie meer van toepassing op ons suidelike sinodes maar as gelowiges deel ons is mekaar se lief en leed. Ons gemeentes kan dit ook inrig as 'n Gebedsdag waarin ons almal se afhanklikheid van die sorg van ons Vader verklaar en bely word.

## **'n Konsep Gedragskode vir Godsdienste in Suid-Afrika**

[Hier](#) is geleentheid om insette te lewer in die dokument waaraan prof Pieter Coertzen en sy span werk.

## **Taize-byeenkoms**

Ons het hierdie skrywe vanaf die kantoor van die Algemene Sekretaris ontvang:

In 2019 word 'n weeklange samekoms van die Taizé-gemeenskap in die Kaapstad beplan. Daar word beoog om plus minus 6000 jongmense by die geleentheid te betrek. Die byeenkoms sal fokus op kerkeenheid en die ekumeniese verhoudings. Dit is 'n kosbare geleentheid vir ons jongmense tussen 18-35.

Ons verneem graag of daar uit julle sinode persone is wat belangstel in Taizé en kontemplatiewe spiritualiteit of wat verantwoordelik is vir die jeug. Indien wel, sal ons bly wees as julle hulle kan inlig van die vergadering met Vader Luc en Norbert van Tiazé, wat by die Algemene Sinode Kantore beplan word vir 27 September om 14:00. Ter wille van beplanning wil ons versoek dat belangstellendes hulle teenwoordigheid by Sophia de Kock ([sophiadc@ngkerk.org.za](mailto:sophiadc@ngkerk.org.za)) voor / op 14 September bevestig.

## **GESAMENTLIKE WERK**

**Bybel-Media** se [Nuusbrief](#) word hier aangeheg. Hierdie week gaan dit oor [LiG](#) en die [Kerkbode](#). Een van ons gemeentes,

Doornkloof, is op die voorblad van die Kerkbode!

Hulle vertel ook van 'n opwindende nuwe [Bybelboek-reeks](#)

**Excelsus** stel 'n kursus in [Spirituele Begeleiding](#) bekend.

**Excelsus** vertel ook van 'n [oggendgeleentheid](#) oor **Spiritual en Emotional Health in Full Time Ministry** met **Nancy Schongalla-Bowman**, Director of Student Counselling, Princeton Theological Seminary. Dit word op 7 Augustus aangebied.

**Excelsus** gee ook inligting oor 'n **Werkswinkel oor die Opleiding van Begeleiers van 'n Bedieningsdiagnose in Gemeentes**. Dit word deur prof Malan Nel aangebied. Hy skryf [hier](#) volledig oor hierdie geleentheid.

**Lentekonferensie 2018** vind plaas op 18 – 20 September. Die volledige programgids is [hier](#) beskikbaar.

Kom ontmoet **professor Stefan Paas** van die Vrije Universiteit in Amsterdam: op 8 Augustus het leraars die geleentheid om 'n oggend saam met een van die voorste missioloë in die wêreld deur te bring. Die gesprek handel oor sekularisasie en missionale kerkwees. 'n Volledige [pamflet](#) vertel meer.

**CMR Mpumalanga** deel met ons 'n [storie van hoop](#).

## **EMERITI**

**Prof Andrie du Toit** – voorheen Nuwe Testamentikus aan die Universiteit van Pretoria – is verlede week oorlede. Sy gedenkdien vind Vrydag 27 Julie om 11:00 plaas in die NG Kerk Valleisig.

Hy het met sy kennis, geloof en menswees 'n hele geslag leraars geraak. Ons eer die Here vir sy lewe en werk.

## **VERJAARSDAE**

**Geluk** aan almal wat tot 6 Augustus 2018 verjaar.

## **Gemeentes:**

- 24 Julie – Badplaas, [ngkerkbadplaas@tiscali.co.za](mailto:ngkerkbadplaas@tiscali.co.za) (45)  
25 Julie – Debruinpark-Ermelo, [ngkdeberm@telkomsa.net](mailto:ngkdeberm@telkomsa.net) (45)  
29 Julie – Moreletapark, [info@moreleta.co.za](mailto:info@moreleta.co.za) (33)  
3 Augustus – Witbank-Vallei, [ngwitbank.vallei@gmail.com](mailto:ngwitbank.vallei@gmail.com) (38)  
4 Augustus – Ermelo-0os, [skriba@ermoos.co.za](mailto:skriba@ermoos.co.za) (62)

## **Emeriti:**

- 30 Julie – Neels van Zyl, Olifantsfontein 2011, [vanzyl.neels@gmail.com](mailto:vanzyl.neels@gmail.com)  
3 Augustus – Steph Combrinck, Lyttelton 2005, [sc.steph.combrinck@gmail.com](mailto:sc.steph.combrinck@gmail.com)

## **Predikante:**

- 24 Julie – Danie Veldsman, Dosent UP, [danie.veldsman@up.ac.za](mailto:danie.veldsman@up.ac.za)  
25 Julie – Pierre Engelbrecht, Valleisig, [pierreengelbrecht1@gmail.com](mailto:pierreengelbrecht1@gmail.com)  
26 Julie – Anton Badenhorst, Pretoria-0osterlig, [anton@oosterlig.co.za](mailto:anton@oosterlig.co.za)  
2 Augustus – Cas Wepener, Dosent UP, [cas.wepener@up.ac.za](mailto:cas.wepener@up.ac.za)  
3 Augustus – Neels Müller, Pretoria-0osterlig, [neels@oosterlig.co.za](mailto:neels@oosterlig.co.za)  
4 Augustus – Christie Smit, Lydenburg, [christiepos@gmail.com](mailto:christiepos@gmail.com)  
4 Augustus – Chris Swart, Doornkloof, [chris@dkfk.co.za](mailto:chris@dkfk.co.za)  
5 Augustus – Uli Trümpelmann, Malelane, [ulitrump@icloud.com](mailto:ulitrump@icloud.com)  
6 Augustus – Alphonso Groenewald, Dosent UP, [alphonso.groenewald@up.ac.za](mailto:alphonso.groenewald@up.ac.za)  
6 Augustus – Dirk Human, Dosent UP, [dirk.human@up.ac.za](mailto:dirk.human@up.ac.za)

Groete tot 7 Augustus 2018.

***Francois Retief***

***Uitvoerende Amptenaar***

# Familiebrief 2018/5

*Familiebrief 2018/5*

16 Mei 2018

*Die volgende is met geringe aanpassings oorgeneem uit 'n nuusbrief van die NG Kerk Sinode Goudland.*

**DIE SUID-AFRIKAANSE INKOMSTEDIENS (SAID)**

**EN DIE**

**KERK AS OPENBARE WELDAADSORGANISASIE**

*Afkortings wat in hierdie nuusbrief gebruik word*

## **Afrikaans**

BVE	Belastingvrystellingseenheid
NWO	Nie-winsgewende organisasie
NWO	Openbare Weldaadsorganisasies



OWO	Openbare Weldaadsorganisasies
SAID	Suid-Afrikaanse Inkomstediens

## Engels

NPO	Non-profit Organisation
PBO	Public Benefit Organisation
SARS	South African Revenue Services
TEU	Tax Exemption Unit

## AGTERGROND

Hierdie skrywe oor **Registrasie as Openbare Weldaadsorganisasies (OWO's)** word gesirkuleer na aanleiding van 'n besoek namens die NG Kerk aan die Belastingvrystellingseenheid (TEU = Tax Exemption Unit) van die SAID.

Daaruit het dit geblyk dat daar waarskynlik verwarring en selfs onduidelikheid in die kerk bestaan oor 'n aantal sake, soos:

1. moet gemeentes/kerklike strukture register as OWO?;
2. die kwessie van fidusiêre aanspreeklikheid;
3. asook die verwarring rondom die onderskeid tussen die registrasie as NWO (nie-winsgewende organisasie, NPO in Engels) en OWO (openbare weldaadsorganisasie, PBO in Engels).

## INKOMSTEBELASTING EN EIENDOMSBELASTING

Nog 'n uitdaging aan kerke is die feit dat daar dikwels in ons gesprekke en denke nie duidelik **onderskeid** gemaak word tussen die betaal van **inkomstebelasting** en die betaal van **eiendomsbelasting** nie.

**Inkomstebelasting** word hanteer deur die **SAID**, terwyl **eiendomsbelasting** 'n saak is wat resorteer onder die plaaslike

regering (**munisipaliteit**).

Kerke geniet gewoonlik vrystelling van **eiendomsbelasting** op alle geboue wat vir kerklike doeleindes gebruik word. Waar kerke eiendom besit wat nie vir kerklike doeleindes gebruik word nie (verhuring van huise, kantore, of wat ookal wat dus as direkte handelsbedryf beskou word), kan die plaaslike owerheid op daardie eiendomme belasting hef.

Die staat het nie 'n eenvormige beleid hieroor nie. 'n Plaaslike owerheid neem eie besluite oor eiendomsbelasting. Onderhandelinge op plaaslike vlak moet hierdie saak aanspreek. Ervaring het geleer dat die NG Kerk nie alleen hieroor met die plaaslike owerheid moet onderhandel nie. Kry vennote vanuit die hele spektrum van kerke om die gesprekke te voer.

Sover dit **inkomstebelasting** aan betref, is daar wel 'n koppeling met eiendomsbelasting, in die sin dat as kerkeiendom verhuur word vir nie-kerklike gebruik (waarop dan dalk eiendomsbelasting gehef word deur die munisipaliteit), die **huurinkomste** addisioneel ook dan belasbaar is deur die SAID – en as sodanig as inkomste aangedui moet word op die inkomstebelastingvorm.

Daar bestaan 'n gids oor die hantering van inkomstebelasting, naamlik die Tax Exemption Guide for Public Benefit Organisations in South Africa Issue 2 (19 September 2016) – verkrygbaar op SAID se webtuiste by <http://www.sars.gov.za/ClientSegments/Businesses/TEO/Pages/default.aspx>.

## **OPENBARE WELDAADSORGANISASIE**

Van die probleme wat die Belastingvrystellingseenheid tydens hul ondersoek ontdek het, is die volgende:

1. die nie-indiening van jaarlikse belastingopgawes [IT12EI] deur OW0's. Ten spyte van die feit dat baie gemeentes en kerklike strukture wel geregistreer is by

SARS vir belastingvrystelling, dien hulle nie jaarliks 'n opgawe in nie – of hulle dui slegs 'n nul-balans in die state aan sonder om aan te toon hoe hulle daarby uitgekom het.

2. daar is gemeentes wat probeer om 18A kwitansies uit te reik vir donasies wat aan die gemeente gemaak is. Dis onwettig. Hierdie kwitansies kan slegs uitgereik word as 'n instansie daarvoor geregistreer is – en dan ten opsigte van 'n goedgekeurde aktiwiteit.
3. dit is egter onwaarskynlik dat gemeentes sal kwalifiseer vir Artikel 18A registrasie, aangesien die aangeduide aktiwiteite wat daarvoor goedgekeur is, nie Godsdiens, Geloof en Filosofie insluit nie. Slegs goedgekeurde OWO's, met ook status in terme van Artikel 18A van die Wet, kan 'n 18A kwitansie aan skenkers uitreik.
4. gemeentes/ kerklike instansies laat na om besigheidsinkomste te verklaar – veral t.o.v. verhuring van geboue en konferensieriewe;
5. veranderinge in die konstitusies/bepaalde Kerkorde-artikels van geregistreeerde gemeentes/sinodale strukture, wat nie onder die aandag van die Kommissaris gebring word nie;
6. verandering in fidusiêre verantwoordelike persone wat nie onder die aandag van die Kommissaris gebring word nie – en waarskynlik die negering van die rol wat hierdie persone in die finansiële verantwoording van gemeentes behoort te speel;
7. in gebreke bly van kennis gee van adresverandering van gemeentes.

### ***Hoekom registreer as 'n Openbare Weldaadsorganisasie?***

Enige persoon of entiteit in die land (wat ook as 'n regspersoon geld) wat inkomste bokant 'n bepaalde bedrag per jaar genereer, is onderhewig aan die betaal van belasting op die ontvangs daarvan. Voorheen was kerke deur die wet outomaties vrygestel van inkomstebelasting. Dit is egter

verander.

Registrasie as 'n OWO onder die Inkomstebelastingwet 58 van 1962 (soos gewysig) [hierna die "Wet"] by die SAID is dus 'n vrywillige opsie met die oog op die vrystelling van inkomstebelasting.

Om belastingvrystelling te geniet moet 'n gemeente, 'n ring, 'n sinode en die Algemene Sinode dus registreer as 'n OWO. Sien Artikel 10 (1)(cN) [Vrystellings] van die Wet.

Die aktiwiteite van die betrokke organisasie sal dan bepaal of dit kwalifiseer vir vrystelling van inkomstebelasting onder Artikel 30 [Openbare Weldaadsorganisasies] van die Wet, of ook vir uitreiking van kwitansies onder Artikel 18A [Aftrekking van skenkings aan sekere organisasies] van die Wet, ten opsigte van donasies.

Een van die kwalifiserende aktiwiteite vir OWO-registrasie en derhalwe vir die vrystelling van Inkomstebelasting, is "godsdiens" (sien punt 6 van Basic Guide to Income Tax for Public Benefit Organisations). Daar word Godsdiens, Geloof en Filosofie as 'n goedgekeurde aktiwiteit gelys.

Gemeentes en die meeste kerklike strukture behoort dus suksesvol te wees in hulle aansoek tot OWO-registrasie.

***Is ons gemeente geregistreer as 'n Openbare Weldaadsorganisasie?***

Gemeentes kan uitvind of hulle as 'n OWO geregistreer is deur na *e-filing* te gaan en vir 'n aanslagvorm te vra. Die nommer op die vorm wat met 'n "9" begin, is die registrasienommer. Navraag kan ook direk by die SAID se Belasting Vrystellingseenheid gedoen word.

***Hoe kan ons registreer as 'n Openbare Weldaadsorganisasie?***

Om te registreer as 'n OWO moet die volgende dokumente by die Belasting Vrystellingseenheid van die SAID ingedien word:

1. vorm EI1: Voltooide en ondertekende aansoek om as 'n OWO te registreer;
2. vorm EI2: Geskrewe onderneming en onderteken deur die drie fidusiêre persone, wat nie verbonde persone met betrekking tot mekaar is nie, van die organisasie wat die fidusiere verantwoordelikheid vir die OWO onderneem.
3. gesertifiseerde afskrif van die stigtingsdokument (konstitusie) wat moet voldoen aan die vereistes van Vorm EI2.
4. 'n goedgekeurde OWO kwalifiseer ook, onder sekere bepaalde voorwaardes in elke geval, vir vrystelling van: Oordragkoste, Boedelbelasting, Kapitaalwinsbelasting, Donasiebelasting, BTW, Vaardigheidsontwikkelingsheffing en Dividende belasting.

Al die inligting is op ons webwerf beskikbaar by <http://sinoos.co.za/said/>

*Cathy Odendaal*

**Bedryfsbestuurder**

**NG Kerk Oostelike Sinode**

Tel (012) 804-9543/4

Faks (086) 720-8742

---

# FAMILIEBRIEF 2018/4

Geloofsbrief kan [hier](#) afgehaal word.

*Familiebrief 2018/4*

12 April 2018

## **SINODESITTING 2018 en GELOOF SBRIEF**

Goeiedag vanuit die Sinodehuis. Ek vertrou dat dit daar by julle voorspoedig gaan en dat die Paastyd inderdaad 'n tyd van nuwe lewe en groei sal wees.

Hierdie skrywe dien as die **formele kennisgewing** van die Sinodesitting van Oostelike Sinode wat op **21 – 23 Oktober 2018** by die NG Kerk Pierre van Ryneveld plaasvind.

Ons heg hierby aan die [Geloofsbrief](#) wat julle moet voltooi met die oog op die sinodesitting. Voltooi dit volledig soos op die vorm aangedui.

Artikel 33 van die Kerkorde beskryf die afvaardiging na die sinodesitting:

*"Die Sinode word saamgestel uit een predikant en een ouderling/diaken as afgevaardigdes deur die kerkraad van elke gemeente binne die sinodale gebied. Waar die pos van predikant vakant is, kan 'n ouderling/diaken in die plek van die predikant afgevaardig word."*

*"As 'n gemeente méér as een pos vir predikant het, het die kerkraad die reg om meer predikante en nog een ouderling/diaken vir elke bykomende predikant af te vaardig. Waar in sodanige gemeente 'n pos vir predikant vakant is, mag die kerkraad 'n ouderling/diaken vir die vakante pos afvaardig."*

Gee asseblief dadelik hieraan aandag sodat die voltooide geloofsbrief teen **30 Junie 2018** by die Sinodehuis sal wees.


Die datum van **30 Junie 2018** is ook die spertyd vir enige saak wat aan die Sinode voorgelê wil word. Sodanige sake word dan hanteer in oorleg met die gevestigde werkswyse en besluite van die Sinode.

Kontak gerus die Sinodehuis met enige navrae.

**Francois Retief**  
**Uitvoerende Amptenaar**

---

## **FAMILIEBRIEF 2018/02**



14 Maart 2018

**Familiebrief 2018/02**

**GEMEENTES VAN DIE OOSTELIKE SINODE**

Goeiedag vanuit die Sinodehuis!

## **FINANSIËLE STAAT 2017/2018**

Die einde van die finansiële jaar was op 28 Februarie – en dit beteken dat die finansiële state afgehandel moet word. Die volgende sake is belangrik:

1. Die state word hierby aangeheg. Gee dit asseblief aan julle ouditeur of rekenmeester. Gebruik slegs hierdie formaat vir die state.
2. Die besluit van Oostelike Sinode (2016) oor die opstel van state word in die state gegee. Die kerkraad moet hieroor 'n besluit neem.
3. Reël met die ouditeur/rekenmeester dat hierdie state by Oostelike Sinode moet wees teen 15 Junie 2018. Help hulle dan deur toe te sien dat alle dokumente gereed is sodat hulle die werk dadelik kan afhandel.
4. Die Basiese Inligting-vorm asook die Inventarisvorm word ook hierby aangeheg.
5. Al die vorms is ook op [www.sinoos.co.za](http://www.sinoos.co.za) beskikbaar.

Sterkte vir hierdie besige tyd in 'n kerkkantoor!

Baie groete

**Cathy Odendaal**  
**Bedryfsbestuurder**



## **FAMILIEBRIEF 2018/1**

**RIGLYNE VIR DIE VERGOEDINGSPAKKETTE VAN LERAARS VIR DIE FINANSIËLE JAAR 1 MAART 2018 TOT 28 FEBRUARIE 2019.**

---

## **FAMILIEBRIEF 2017/6**

Familiebrief 2017/6 word vervang met:

**RIGLYNE VIR DIE VERGOEDINGSPAKKETTE VAN LERAARS VIR DIE FINANSIËLE JAAR 1 MAART 2018 TOT 28 FEBRUARIE 2019.**

---

## **FAMILIEBRIEF 2017/5**

**VOETSPOOL SINODESITTINGS**

Hierdie spesiale Familiebrief nooi julle as gemeente uit na

die Voetsool Sinodesittings wat vir 2018 beplan word. Lees [meer](#).

---

## **FAMILIEBRIEF 2017/3**

### **GEMEENTES IN DIE OOSTELIKE SINODE**

Goeiedag vanuit die Sinodehuis in Pretoria!

### **SINODALE BYDRAES 2017/2018**

Familiebrief 2017/3 insake Sinodale Bydraes 2017/2018 [aangeheg](#).

Baie dankie

***Francois Retief***  
***Uitvoerende Amptenaar***  
[uitamp@sinoos.co.za](mailto:uitamp@sinoos.co.za)

---

# FAMILIEBRIEF 2017/1

24 Februarie 2017

## GEMEENTES VAN DIE OOSTELIKE SINODE

Goeiedag vanuit die Sinode huis!

## FINANSIËLE STAAT 2016/2017

Die einde van die finansiële jaar is op 28 Februarie – en dit beteken dat die finansiële state afgehandel moet word. Die volgende sake is belangrik:

1. Die state word hierby [aangeheg](#). Gee dit asseblief aan julle ouditeur of rekenmeester. Gebruik slegs hierdie formaat vir die state.
2. Die besluit van Oostelike Sinode (2016) oor die opstel van state word hier ingevoeg. Die kerkraad moet hieroor 'n besluit neem.

Die Familiereëls Bepaling 41.5 word gewysig om te lees:

*Alle gemeentefondse word in 'n enkele finansiële stelsel gadministreer. Kerkrade besluit self of hulle die gemeente se finansiële state jaarliks wil laat ouditeer of slegs 'n "Onafhanklike Oorsig" deur 'n geregistreerde Rekeningkundige Beampte wil laat doen.*

*Voetnota: Die volgende beginsels geld deurentyd:*

- *Die kerkraad is verantwoordelik om toe te sien dat*

*alle finansiële prosesse – ook die opstel van finansiële state – by die gemeente vertrouwe skep en aan die hoogste standarde voldoen.*

- *Die kerkraad stel jaarliks 'n persoon aan om die finansiële state op te stel. Die kerkraad sien toe dat hierdie persoon onafhanklik kan funksioneer sonder enige botsing van belange.*
- *Die kerkraad behandel die finansiële state en doen verslag aan die gemeente nadat dit goedgekeur is.*

3. Reël met die ouditeur/rekenmeester dat hierdie state by Oostelike Sinode moet wees teen 15 Junie 2017. Help hulle dan deur toe te sien dat alle dokumente gereed is sodat hulle die werk dadelik kan afhandel.

4. Die state is ook op [www.sinoos.co.za](http://www.sinoos.co.za) beskikbaar.

Sterkte vir hierdie besige tyd in 'n kerkkantoor!

**DS FRANCOIS RETIEF**  
**BEDRYFSBESTUURDER**

---

## **FAMILIEBRIEF 2016/10**

8 Desember 2016

**GEMEENTES IN DIE OOSTELIKE SINODE**

**SINODALE BYDRAES 2016/2017**

Goeiedag vanuit die Sinode huis in Pretoria! Ons vertrou dat julle die laaste deel van die jaar onder beheer het.

Ons is nou in die laaste kwartaal van 2016/2017 (Desember –

Februarie) vir die betaling van die sinodale bydraes. Ons Sinode se tradisie is dat elke gemeente al hulle sinodale bydraes jaarliks betyds betaal. Kom ons doen dit weer so!

Gemeentes ontvang vandag 'n staat wat per e-pos versend is. Maak asseblief seker dat die finansiële beampte dit ontvang. Op die staat verskyn die vierde kwartaal-betaling. Die bedrag betaalbaar verskyn op die staat. Waar die bedrag as 'n "Krediet (CR)" aangedui word, word die bedrag in Februarie 2017 aan die gemeente terugbetaal. Alle betalings tot en met 30 November 2016 is hierop aangedui.

Betaling moet asseblief teen **15 JANUARIE 2017** geskied soos wat ons reëling is.

Gemeentes wat **maandeliks** betaal, moet asseblief hulle betalings so aanpas dat hulle die bedrag aangedui as "Bedrag verskuldig" **voor 7 Februarie 2017** oorbetaal. Dit gee aan ons die geleentheid om verskille uit te klaar voor die einde van die finansiële jaar.

Die besonderhede vir direkte betalings in die Sinode se bankrekening is steeds soos volg:

**NG Kerk Oostelike Sinode, ABSA Bank, takkode 632005, rekeningnommer 1420-146-562**

E-pos asseblief die bevestiging van betaling na [finans@sinoos.co.za](mailto:finans@sinoos.co.za)

Skakel gerus met enige navrae. Ons help graag hier vanuit die Sinode huis!

Vriendelike Oostelike Sinode-groete. Mag die Kerstyd vir julle vol vreugde en liefde wees.

**DS FRANCOIS RETIEF**  
**UITVOERENDE AMPTENAAR**